



Gabinete Wever - Croes II

# ISLAONLINE

Noticia di Gobierno

2023

Diamars 29 Augustus 2023

Email: [IslaOnline@gobierno.aw](mailto:IslaOnline@gobierno.aw) Tel: 528-4952

**2023**  
**AÑA DI**



**UNION**  
**Y POSITIVISMO!**



@IslaOnline2023





*Evelyn Wever-Croes*  
PROME MINISTER

## PIUS X SCHOOL A INSTALA EBOARDS CU NAN A GANA CU E PROYECTO DI EDUTECH

**“Mi ta spera cu e entusiasmo y envolvimento di e muchanan den klas, na final, lo refleha resultadonan positivo”**



Diamars mainta 29 di augustus, Prome Minister Evelyn Wever-Croes hunto cu Presidente di Parlamento Edgard Vrolijk y Parlamentario Hendrik Tevreden a bishita Pius X School y a admira con e docentenan y muchanan ta traha cu e materialnan cu nan a gana cu e proyecto di Edutech. Durante e competencia, Pius X a logra gana un total di 7 eBoard pa 7 di nan klas local. Pa completa 9 klas, a haci un peticion na WEB Aruba NV pa sponsor e otro 2 eBoards cu falta. E peticion aki a wordo aproba, y awe Pius X School tin un eBoard pa cada klas.

Prome Minister a indica di ta hopi impresiona pa tur loke cu Pius X School ta bin ta haciendo, no solamente cu e proyecto di Edutech, sino cu nan participacion na casi tur evento di

innovacion den enseñansa. E docente y alumnonan ta hopi contento di a ricibi e eBoardsnan aki cu sigur lo haci e lesnan den klas mas facil y mas agradabel. Pa algun docente e adaptacion na e sistema nobo aki a dura un poco mas, pero nan tur ta trahando cu e mesun entusiasmo y meta, cu ta e bienestar di e muchanan.

“Mi ta gradici Juffrouw Sheila Tromp, cabesante di Pius X School y tur docente, pa nan trabou y efsuerso pa cu educacion di nos yiunan. Tambe na e mayornan pa sigui encurasha nan yiunan pa studia bon, y na e alumnonan pa nan dedicacion na un miho futuro. Mi ta spera cu e entusiasmo y envolvimento di e muchanan den klas, na final, lo refleha resultadonan positivo,” Prome Minister a expresa.



Continuacion POTRETNAN DI PIUS X SCHOOL CU A INSTALA EBOARDS....







## SERLIMAR TA SALI DI 'SURSEANCE VAN BETALING'



Awe ta un dia special den historia di nos compania nacional ya cu despues di 3 aña, Serlimar ta logra sali di 'surseance van betaling' y por continua di desaroya como compania.

E tabata mas cu claro cu Serlimar no por paga e debe astronomico di 20 miyon florin. Riba 8 di mei 2020 e Raad van Toezicht y Gerencia di Serlimar a pidi 'surseance van betaling' pa evita cu mester declara bancarota. Corte a aproba un surseance temporario na 19 di mei 2020.

Na april 2022, a nombra un Raad van Toezicht cu, no obstante cu e ley di Good Corporate Governance no ta finalisa, tur e miembro nan a pasa procedura di screening prome cu nan a ser nombra. A traves di esfuersonan durante e ultimo aña a logra convence huez pa extende e 'surseance van betaling' dia 20 di mei 2022. A logra presupuesta fondo pa paga creditornan. Tambe mester a ahusta e tarifa di Serlimar, y a reforsa esfuersonan di coleccion di tarifa, asina fortificando e compania su posicion financiero.

Algun otro cambionnan cu a wordo haci ta e introduccion di software pa yuda cu pago y cobranza y a reorganisa e contratistanan cu a ser pasa di DOW na Serlimar na aña 2015, sin begroting, cu a causa impacto financiero desasotroso pa Serlimar. Cu e plan "Nos Tera Nos Pais", a logra realoca e ploegnan na bienestar di Naturalesa y Agricultura, bou di e

DNM (Directie Natuur en Milieu)/FPNA (Fundacion Parke Nacional Arikok), BCI (Bureau City Inspector) y Santa Rosa. Esaki tambe a percura pa baha gasto di Serlimar.

Awe, 28 di augustus 2023, Serlimar ta sali di su 'surseance van betaling' y por cuminsa tuma decisionnan riba su mes.. Esaki ta nifica cu e compania a muestra bon señal di ta recuperando y cu ta riba bon caminda pa sali di tur su debenan. Awor, Serlimar tin e oportunidad pa por reinventa su mes y sigui desaroya como compania.

Un di e puntonan cu tin atencion di Minister Arends ta e situacion di trahadonan cu ainda ta den espera di sea periodiek, bevordering y of conversacionnan di funcionamiento. Ta importante pa e situacion di trahadonan keda regla, pa asina por tene tambe motivacion di trahadonan halto. Trahadonan cu a sa di sacrifica den e lucha pa rescata e compania.

Minister Arends ta felicita Serlimar cu nan extenso trabou di recuperacion y ta desea nan hopi exito pa futuro. Mas cu claro, minister ta enfatisa cu 'saliendo for di intensive care no ta nifica cu bo por lanta hunga futbol di biaha'. Pero si ta duna espacio pa Serlimar por cuminsa planea pa por posiciona su mes riba e mercado di procesamiento di desperdicio sostenibel cu ta cai netamente den cuadro di maneho di Ministerio di Naturalesa.



# MINISTER URSELL ARENDS A CELEBRA 35 AÑA DI EXISTENCIA DI OPPA Y A ANUNCIA DIA DI PENSIONADO



Diasabra anochi Minister Arends tabata tin e placer y honor di celebra hunto cu OPPA, 35 aña representando nos adultonan mayor y defendiendo nan interes.

No ta un secreto cu e cantidad di adulto mayor den nos comunidad ta creciendo y cu esey comunidad su deber cu nan tambe. Nos tin cu para keto na e adulto mayor cu na momento di yega na e edad di pensioen oficialmente, ta haci e traspaso di un bida den cual a traha y entrega pa su Pais, pa uno unda Pais ta traha y entrega bek na dje. Asina e tin espacio pa disfruta di e frutanan cu e la yuda planta den su comunidad.

Minister Arends a expresa su gratitud profundo na e sirbidornan balente di pueblo cu ta forma parti di OPPA. Un plataforma cu ta aporta na participacion activo di e grupo importante cu ta nos adultonan mayor.

Probechando di e momento festivo, Minister Arends a anuncia cu Consejo di Minister a declara 25 di juli como 'Dia di Pensionado', siguiendo e peticion di OPPA, y den alineacion cu e vision di Ministerio di Adultonan Mayor. Aruba asina ta uni tambe na e celebracion hunto cu hermana isla Corsou y Boneiro. Un decision cu segun e minister ta resona profundamente cu e compromiso pa honra nos adultonan mayor.



Na mes momento, minister ta remarca cu e dia ta sirbi como reflexion riba e hecho cu ainda nos tin gruponan den comunidad, mayoria biaha migrantenan cu nos a invita pa yuda lanta nos Pais, pero cu no por beneficia di un pensioen, pues Gobierno di Aruba su trabounan pa cu tur nos adultonan mayor pensionado, no ta cla ainda.

Minister Arends ta finalisa enfatisando cu "nos tin e deber na nos mes y na e generacionan cu ta bini despues pa crea un sociedad caminda sabiduria y experiencia di nos adultonan mayor ta sigui wordo aprecia y balora."



## Minister Ursell Arends:

# POLITIEK DEN HAAG MESTER DUNA CLARIDAD RIBA NAN PROPOSICION

Minister Arends a vocifera cu falta claridad di banda di Politiek Den Haag pa loke ta e RAFT den su version actual. E version actual por hiba na 30 miyon menos na interes, pero esey ta solamente riba e debe di COVID. E problema di interes pa Aruba ta e mas di 250 miyon na interes cu mester paga tur aña riba e otro debenan. RAFT den version actual no ta resolve esaki.

Diamars siman pasa Gobierno di Aruba tabata representa den Parlamento pa trata e tema di refinanciamiento di debe di pandemia (COVID-19). Minsiter Arends a indica cu falta splicacion riba kico exacto ta e pakete financiero cu Hulanda ta ofrece, y pakico Den Haag ta nenga di bay di acuerdo cu diferente proposicion di Aruba. "Sin tur informacion, e ta imposibel pa por yega na un conclusion prudente pa cu RAFT", segun Minister Arends.

E problema di interes pa Aruba no ta e 30 miyon cu Hulanda por yuda nos spaar. E problema ta e gasto anual di mas di 250 miyon cu Aruba mester paga na interes. Pa resolve esaki Aruba mester asistencia di Hulanda y hustamente esey no ta parti di RAFT. E situacion financiero di Aruba ta delicado y asistencia di Hulanda por yuda considerablemente. Pero nos no mester regla solamente nos debe cu Hulanda. "Awo cu nos ta na mesa nos mester regla tur cos, no solamente loke nos debe Hulanda pa motibo di un epidemia," Minister Arends a bisa, "pasobra sin Hulanda nos ta keda cu problema grandi."

E version actual di RAFT no ta duna Hulanda espacio pa nan yuda Aruba atende cu e gasto di interes anual rond di 250 miyon florin. No ta comprendibel pakico Hulanda ta hinka den un ley cu nan por discuti solamente 30 miyon pero mester laga un banda e 250 miyon cu Aruba mester paga tur anja pa motibo di un debe nacional enorme.

E 30 miyon di interes ta loke por spaar riba e debe na Hulanda (fiansa di pandemia). Esaki ta hopi importante, pero e ta solamente 15% di e debe nacional. E otro 85% ta debenan di pasado cu nos a hereda na prijs comercial. Aruba lo no por sali di e problematica aki sin Hulanda, pero ta net esaki no ta parti di e solucion cu tin den e RAFT actual. Politiek Den Haag mester papia idioma cla y splica tur hende cu esaki ta e berdad y alabes splica tambe pakico Hulanda ta nenga di yuda nos atende cu e 250 miyon.

Loke mester compronde ta cu na momento cu acepta RAFT, Aruba ta debilita su posicion, sin resolve e asunto di 250 miyon y asina ta laga na Hulanda pa exige pa Aruba resolve e debe ey sin asistencia. Esey ta nifica cu ambtenaarnan na Den Haag lo



bay exige medida drastico cu no semper ta e decisionnan mas apropia pa nos pais. Ya caba cu e supervision regla segun LAFT, nos ta mira e tendencia cu un grupo di ambtenaar Hulandes ta purba duna instruccion na Gobierno di Aruba, dunando consehonan cu no ta "vrijblijvend". Minister Arends ta remarca cu mientras supervision financiero ta positivo, "supervision no por bin na luga di Gobernacion."

Algun Parlamentario tin e pensamiento cu si Aruba acepta RAFT, Hulanda lo yuda cu tur e debe nacional. Segun Minister Arends esaki ta algo cu Hulanda na ningun momento a pretende ni insinua. Al contrario, Hulanda hustamente ta nenga den e RAFT actual di yuda Aruba cu e 85%.

Minister Arends ta finalisa bisando cu aceptando un rijkswet na e condicionnan actual nos no lo logra e miho acuerdo pa Aruba. Gobierno di Aruba tin e obligashon pa sigui lucha pa yega na e miho acuerdo pa Aruba.





DEPARTAMENTO DI IMPUESTO TA SIGUI BRINDA  
SERVICIO DURANTE PERIODO DI MANTENCION  
NA OFICINA PRINCIPAL

Por entrega documento of haya informacion na MFA Paradera y Camacuri

Entrante dialuna dia 28 di augustus 2023, Departamento di Impuesto lo tin 2 localidad habri pa brinda servicio na clientenan cu mester entrega of busca un documento of ta desea di haya informacion. E localidadnan aki ta Oficina anexo na Camacuri y MFA Paradera. E oficina anexo ta e parti di e edificio na Camacuri, na unda ta busca plachi di number.

Localidad	Servicio	Orario
Oficina principal na Camacuri	---	Cera
Oficina anexo na Camacuri (Ta drenta na porta nr. 2)	Servicio di caha pa persona 60+ (no comerciante) y pa e personanan cu ta haya onderstand	7:45 - 11:30   1:15 - 3:30
Oficina anexo na Camacuri (Ta drenta na porta nr. 2)	Busca plachi di number	7:45 - 11:30   1:15 - 3:30
E oficinanan situa na: MFA Noord MFA Paradera MFA Santa Cruz MFA Savaneta Postkantoor San Nicolas	Servicio di caha:  - Haci pago - Registra auto - Entrega plachi di number - Haci cambio riba vehiculo di motor	8:00 - 12:00   1:00 - 3:00
E oficinanan situa na:  Camacuri MFA Paradera	Otro servicionan na cliente:  - Entrega of busca documento - Busca carchi di persoonsnummer - Informacion tocante areglo di pago	Na Camacuri: 7:45 - 11:30   1:15 - 3:30 (Oficina anexo, porta nr. 5)  Na MFA Paradera: 8:00 - 12:00   1:00 - 3:00

E oficina principal na Camacuri ta sigui cera debi na trabounan di mantencion necesario den e sala unda ta ricibi e bishitantenan. Aki ta sigui un bista di e servicionan. E servicio na cliente via telefon 522 7423/522 7424 ta continua durante e orario di custumber: 7:45 - 11:30 | 1:15 - 3:30. Departamento di Impuesto ta pidi su contribuyentenan pa tuma bon nota di e anuncio aki pa asina evita cualkier inconveniencia.





## A RICIBI COLLEGE ARUBA FINANCIEL TOEZICHT



24 di augustus minister mr. Geoffrey Wever hunto cu Minister di Finanzas mr. Xiomara Maduro, a ricibi bishita di College Aruba Financieel Toezicht (CAft) y su secretariado. Meta di e bishita tawata pa elabora riba e proceso pa maneha e kapitaalinvesteringen di Gobierno di Aruba. E proceso aki ta encera un maneho structura pa evalua y selecta proyectonan di inversionnan via “kapitaalinvesteringen” anualmente.

Departamento di Asuntonan Economico, Comercio y Industria (DEACI) bao responsabilidad di minister Geoffrey Wever a duna un presentacion riba e proceso di Kapitaalinvesteringen. Un proceso cu riba peticion di Directie Financien a wordo desaroya pa DEACI. Anualmente tur departamento di gobierno tin e posibilidad pa entrega nan peticion pa kapitaalinvestering na DEACI. Hunto cu Directie Financien cu tambe ta forma parti di e Investeringsevaluatie Commissie ta evalua tur e proyectonan ricibi riba criteria determina. Un criteria importante ta e vision, strategia y maneho di Gobierno di Aruba. Basa riba e evaluacion ta traha un lista di recomendacion di inversionnan cu prioridad. E lista di recomendacion di inversionnan cu prioridad ta wordo manda como conseho na Ministerraad. Tambe durante e presentacion a elabora riba puntonan di mehoracion den e proceso actual. Un punto di mehoracion ta entre otro con pa capacita e aparato gubernamental pa asina facilita y agilisa e proceso pa implementa maneho di gobierno na un manera mas eficiente y efectivo. Pa 2025 ta premira pa digitalisa e proceso di entrega peticion pa kapitaalinvesteringen.



Importante ta cu prioridadnan di maneho riba termino largo ta determina pa asina aloca e fondonan disponibel tambe na un manera mas eficiente y efectivo cu un impacto duradero riba desaroyo di Aruba.

Durante e presentacion tambe a duna informacion riba e proyeccion economico pa 2023 y 2024. Segun e proyeccion economico di DEACI usando e modelo marcoeconomico MARUBA, economia di Aruba lo crece den 2023 cu 10.1% den termino nominal y yega un balor di 6.5 miljard florin, y ta premira pa 2024 un crecimiento di 4.6% den termino nominal y un balor di 6.8 miljard florin.

Minister Geoffrey Wever ta positivo riba e proyeccion economico pero ta mira como reto cu e desaroyo economico mester ta mas basa riba un modelo economico cu ta inclusivo y ta beneficia tur ciudadano. Pa stimula e transicion pa un economia duradero y inclusivo cu participacion di tur ciudadanonan, Minister Geoffrey Wever a elabora riba e necesidad di ehecucion di e Nationaal Actieplan 2023- 2025.

Minister Geoffrey Wever ta gradici DEACI y Directie Financien pa nan trabao continuo y bon cooperacion pa asina facilita y guia e implementacion di maneho di Gobierno di Aruba.





## MINISTER ENDY CROES TA DESEA 5 DEPORTISTA EXITO DEN XXXI U-18 BASEBALL WORLD CUP 2023 NA TAIWAN



Diabierna ultimo, Minister di Enseñansa y Deporte Endy Croes tabata presente hunto cu Parlamentario Shailiny Tromp-Lee na Aeropuerto Internacional Reina Beatrix pa desea cinco e deportistanan: Tai Vic Tromp-Lee, Keyon Ashby, Isaac Mendez, Joan Siera y Nathan Arends hopi exito na Taiwan.

E cinco (5) deportistanan aki a wordo selecciona pa forma parti di Seleccion di Hulanda, Team Kingdom U-18, pa competi den XXXI U-18 Baseball World Cup 2023. Minister Endy Croes ta felicita coach Sr. Randolph Oduber cu e tremendo trabou cu el

a haci cu e hobennan aki y ta desea nan tur clase di exito den nan competencia na Taiwan. Aruba ta orguyoso di boso.

Cu deseo, disciplina, dedicacion y determinacion ta logra.





# MINISTER ENDY CROES TA FELICITA SRA. MEREDITH DIJKHOFF CU A CUMPLI E BUNITA EDAD DI 60 AÑA

Diasabra ultimo, rondona pa famia-y amistadnan Sra. Meredith Dijkhoff a celebra engrande su 60 cumpleaños. E bunita recepcion a tuma luga na residencia di famia Dijkhoff na Tanki Leendert. Sra. Meredith cariñosamente yama Mary ta casa di Sr. Chiki Dijkhoff, mama di Ashline Dijkhoff y Eldrick Dijkhoff y wela di K' drian y Elk-rae. Minister Endy Croes acompaña pa su kerida esposa Dilailah Croes tabata presente pa celebra e ocasion special aki cu Sra. Mary.

Un bunita fiesta di kita sombre y excelente buffet cu Sra. Mary a prepara pa varios luna pa celebra su fecha natal. Sr. Derwin Kemp "Kempy" a habri e fiesta cu e bunita gospel "Mi baranka" pa gradici Dios cu Sra. Dijkhoff a yega e bunita edad di 60 aña. Un tremendo fiesta den union familiar unda a reina un dushi ambiente. E banda Shine Music a deleita tur esnan presente cu nan exitoso repertorio.

Aruba su Soca Monarch y Road Jam di Carnaval 69 Jair "Casper" Dijkhoff y e surprise di e anochi Freddy Rasta a pone e cherry riba e bolo. Minister Endy Croes ta desea Sra. Meredith Dijkhoff hopi bendicion y hopi aña mas di bida y salud! Masha pabien!







# E REFINERIA DI HIDROGENO COMO PARTI DI GREEN HYDROGEN VALLEY, TA BIRA REALIDAD CU E MOU ENTRE ACCIONA ENERGIA, UTILITIES, WEB, ELMAR Y RDA



For di e portanan di Aruba su refinaria, cordando e anochi cu a bay den 'Accion Ora Cero' pa salba e refinaria, salba e pilar economico aki pa Aruba, Minister di Energia, Sr. Glenbert Croes ta anuncia na henter comunidad, nos pais y nos pueblo, cu e Companianan di Gobierno, Utilities, WEB, ELMAR y RDA a firma un MOU (memorandum of understanding) cu e multinacional Acciona Energia.

E MOU aki ta pa e desaroyo di un refinaria di hidrogeno. Pero tambe hunto cu un valley di hidrogeno, desaroya otro componentenan di inversion energetico, plantanan hydrokimico cu ta bay produci diferente productonan basa riba hidrogeno cu lo nifica e transformacion di Aruba su refinaria.

Di un refinaria tradicional, e refinaria lo bira uno nobo y cu un futuro nobo. Un refinaria di hidrogeno cu lo produci green hydrogen, un desaroyo cu basicamente ta e rescate di e refinaria. Pa e mandatario esaki ta loke a lucha p'e for di e anochinan di Accion Ora Cero te cu awor. Añanan a pasa pero a keda cu fe. Minister Croes a señala, manera Libertador Betico Croes a yega di bisa, cu si tin 1% chens pa habri refinaria mester lucha p'e.

Aruba Hydrogen Valley ta un refinaria di y pa futuro, un vision nobo cu ta garantisa cu e refinaria no ta cera mas. Por a mira refinarianan tradicional bin, refinarianan bay, pero awor ta bin

un refinaria totalmente nobo, concepto nobo y vision nobo. Un refinaria di hidrogeno cu ta produci hidrogeno y tur planta hydrokimico cu ta opera basa riba hidrogeno.

Pa Aruba e ta un comienso nobo pa hunto cu energia solar, cu e parke di molina di biento, hunto cu Eagle LNG, Acciona Energia y otro desaroyonan cu ta bay bin, ta bay crea cupo di trabao pa hopi trahado. Ta bay crea trabou pa contratistanan y comerciante, e ta bay crea bonansa economico pa San Nicolas y Aruba henter y pone Aruba riba mapa internacional. Aruba lo bira un pais cu ta tuma su calidad di bida y medio ambiente na serio y calidad di futuro generacion na serio. Aruba ta cana e caminda di decarbonisacion, cumpli cu e acuerdo di Paris, pero tambe crea prosperidad economico pa Aruba su pueblo, pa nos yiunan y nos pais. Esaki ta un dia historico y increibel cu pa futuro lo sigui papia di e dia aki, ora cu e companianan di gobierno di Aruba, y di pueblo a firma un MOU cu e multinacional Acciona Energia.

Minister Croes a sigui bisa cu pronto lo mira movecionnan grandi, moderno, nobo na San Nicolas. Pronto nos lo weita nos yiunan di tera bek trahando den Aruba Hydrogen Valley. Minister Croes a gradici e liderazgo di tur compania di gobierno Utilities, WEB, ELMAR y RDA. Tambe a gradici Acciona Energia pa deposita confiansa y inversion den pais Aruba y e desaroyo cu ta bay haci den e refinaria.

Un gran pabien pa pais Aruba y ta bay keda determina pa pronto pueblo di Aruba bay mira desaroyo y construccion tuma luga.

"Mi ta termina e informe aki pa pueblo di Aruba cu e palabranan cu Acciona Energia a expresa den su comunicado: "With this MOU, ACCIONA Energia and the Government of Aruba embark on a collaboration to establish a renewable hydrogen ecosystem for Aruba that aims not only to transform local industries, but to also extend the reach to the Caribbean region and beyond".

Un era nobo ta cuminsa awe pa Aruba.





# RESUMEN DI SIMAN

Asuntonan General,  
Innovacion,  
Organisacion Gubernamental,  
Infraestructura y  
Planificacion Teritorial

PROME MINISTER, EVELYN WEVER-CROES

19 - 25 augustus, 2023

## • META DI LANDSPAKKET TA PA OPTIMALISA Y REFORSA SECTOR PUBLICO

Prome Minister ta desmenti un comunicado recién indicando cu funcionarionan Hulandes ta haciendo un inventario pa kita 1500 pa 2000 ambtenaar for di trabou. Prome Minister ta informa cu e informacion aki no ta correcto y ta splica cu pa locual ta optimilisacion di aparato gubernamental, a inicia desde aña pasa, por medio di e landspakket, un destaho na unda cu lo traha riba e restructuramento di e aparato gubernamental cu e meta pa crea un aparato gubernamental cu ta reforsa y ta eficiente.



## • MISS UNIVERSE ARUBA

Diadomingo ultimo a tuma luga e gran evento di Miss Universe Aruba, na unda un total di 5 participante a concursa pa e corona di Miss Universe Aruba. Prome Minister ta felicita srta Karol Croes cu a logra e titulo maximo, y tur otro candidata cu a sa di duna tur di nan mes riba e anochi special aki. Un gradicimento ta bay pa e organisacion di Miss Universe Aruba, e team completo di Futura pa nan cooperacion den e competencia aki, y tur esnan cu di un of otro manera a yuda pa haci e evento aki uno exitoso.





### • REUNION DEN PARLAMENTO RIBA REFINANCIAMENTO DI E DEBE DI PAIS ARUBA

Den trascurso di siman a tuma luga un reunion den Parlamento, na unda Prome Minister a duna informacion riba con e negociacionnan cu Hulanda ta bayendo pa cu e refinanciamiento di e debe di pais Aruba. Prome Minister a splica cu e debe aki ta madura na Oktober y cu mester yega na un acuerdo con Aruba ta bay paga e debe aki bek.

Mirando cu Aruba no tin placa pa paga bek, a tuma decision pa refinancia. Hulanda a bay di acuerdo, pero a bin cu condicionnan menos beneficioso pa pais Aruba. Aki ta unda a surgi un debate, y lo mester purba pa hunto como lidernan di e pais, yega na un balans den e miho interes di pais Aruba.



### • REUNION CU COMMANDANT FRANK BOOTS Y COMMANDEUR WALTER HANSEN

Prome Minister a reuni cu Commandant Frank Boots y Commandant Walter Hansen. Despues di 3 aña, como commandant naval di defensa den Caribe y director di kustwacht, sr. Boots su contract a finalisa, y e lo bolbe bek Hulanda.

E puesto a wordo traspasa oficialmente diahuebs, 24 di Augustus, 2023, na Corsou pa commandant Walter Hansen. Prome Minister ta gradici Commandant Boots pa tur su añanan di trabou, su bon cooperacion, y su esfuerso na yuda tene Aruba su costanan sigur, y ta desea Commandant Hansen tur clase di exito den su funcion nobo.



### • REUNION CU SECRETARIO DI ESTADO ALEXANDRA VAN HUFFELEN

Prome Minister hunto cu su conseheronan a reuni cu Secretario di Estado Alexandra van Huffelen relaciona cu e negociacionnan riba e debe di Covid. Prome Minister a expresa cu e tawata un bon reunion na unda cu diferente puntonan di agenda a wordo trata. Secretario di Estado van Huffelen tambe a keda satisfecho cu e reunion y a expresa cu lo sigui na mesa di negociacion na bienestar di e pueblo di Aruba.



Uni forsa y cu  
positivismo  
ta produci  
beneficianan grandi  
den diferente area pa  
famianan, politica,  
matrimonio, pais, etc  
Hunto nos ta uza e  
benificianan aki pa  
engrandece nos mes  
y Aruba.



2023

AÑA DI UNION Y POSITIVISMO! \_\_\_\_\_